

## ISPOVIJEST

Od mene ovdje neće ostati ni sjenka  
A tamo kuda idem

nikada stići neću

Dvije vjerne daljine Dva psa čuvara  
Zarđali vrtovi Gusti olovni vazduh  
Prepun davnih glasova koje raznosi  
vjetar

Ptice sjećanja bezglavo udaraju  
U trošne zidove ljeta i padaju kao  
smrtonosna kiša

Rijeka bez obala Mostovi bez vidika  
Pepeo govora i dim neizgovorenog  
I ja

Vječiti stranac

Drvo na ivici provalije  
Zrnce pijeska na pustom proplanku  
godina

Praznina koja ponavlja sebe  
U crnim ogledalima  
Praznina koja upornošću kamena  
i snagom vode

Iz dana u dan

raste